

I - ARABAKO BILTZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

OGASUN, FINANTZA ETA AURREKONTU SAILA

Diputatuen Kontseiluaren 34/2014 Foru dekretua, ekainaren 25ekoa, onartzen duena "Zuhaitza bizitza da" aparteko interes publikoko ekitaldian laguntzeko programarekin lotutako zerga pizgarriak aplikatzeko prozedura

Foru dekretu honen xedea ondokoa da: uztailaren 12ko 16/2004 Foru Arauan (irabazteko xederik gabeko erakundeen zerga araubideari eta mezenasgoaren zerga pizgarriei buruzkoan) "Zuhaitza bizitza da" aparteko interes publikoko ekitaldian laguntzeko programarako ezarritako zerga pizgarriak aplikatzeko eta aitortzeko prozedura finkatzea. Programa hori azaroaren 14ko 39/2013 Foru Dekretuaren bitartez onartu zen.

Era berean, baldintza jakin batzuetan, Estatuko eta gainerako foru lurraldeetako organo eskudunek adierazitako aparteko interes publikoko ekitaldietan laguntzeko programetarako aitorturiko zerga pizgarrien elkarrekikotasuna xedatzen da.

Prozeduraren izapideetan xedapen orokorrak egiteari buruzko indarreko araudiak jarraitu dira. Izan ere, 48/2033 Foru Dekretuaren 4. artikulua xedatutakoarekin bat etorri, jendaurrean jarri zen 15 egunez, iragarkia ALHAOn (47. zenbakia, 2014ko apirilaren 30a) argitaratuta, xedapenaren izaerak hala gomendatzen baitzuen. Era berean, Arabako Foru Aldundiaren Aholku Batzordeak 2014ko maiatzaren 28an aldeko irizpidea eman zuen.

Aztertu da Zerga Araudiaren Zerbitzuak horren inguruan emandako txostena.

Horregatik, Ogasun, Finantza eta Aurrekontu Saileko foru diputatuak hala proposatuta eta Diputatuen Kontseiluak gaur bertan egindako bilkuran gaia aztertu ondoren, hauxe

XEDATZEN DUT

1. artikulua. Edukia eta aplikazio eremua

1. Foru dekretu honen helburua ondokoa da: "Zuhaitza bizitza da" aparteko interes publikoko ekitaldian laguntzeko programarekin loturiko zerga pizgarriak aplikatzeko prozedura eta eskakizunak finkatzea. Programa hori azaroaren 14ko 39/2013 Foru Dekretuaren bitartez onartu zen, uztailaren 12ko 16/2004 Foru Arauan (irabazteko xederik gabeko erakundeen zerga araubideari eta mezenasgoaren zerga pizgarriei buruzkoan) 30. artikuluan xedatutakoa aplikatuz.

2. Zerga pizgarri hauek aplikatzeko beharrezkoa izango da zerga administrazioak aldez aurretik horiek aitortzea, foru dekretu honetan araututako jardunbidearen arabera.

3. Zerga administrazioak zerga onuren aplikaziorako beharrezko inguruabarrak eta eskakizunak betetzen diren egiaztatu ahal izango du eta, hala dagokionean, bidezkoa den erregularrizazioa egin.

2. artikulua. Kenkarirako edo hobarirako eskubidea ematen duten gastu, jarduera edo eragiketen eskakizunak

1. Uztailaren 12ko 16/2004 Foru Arauak, irabazteko xederik gabeko erakundeen zerga araubideari eta mezenasgoaren zerga pizgarriei buruzkoak, bere 30. artikuluko 3 zenbakiko Lehenengo idatz zatiko c) letran aurreikusten dituen zerga pizgarrien aplikazioari begira, iritziko da urte anitzeko proiektzioa duten propaganda eta publizitate gastuek letra hartan adierazten diren eskakizunak betetzen dituztela baldin eta foru dekretu honetako 4. artikuluan adierazten den ziurtagiria lortzen badute eta ondoko baldintza hauek betetzen badituzte:

a) Haien mamia hau izan behar da:

1. Liburuxka, kartel, gida, bideo, ikus-entzunezko euskarri edo bestelako gauzetan datzan sustapen edo informazioko material grafikoa edo ikus-entzunezkoa ekoiztea eta editatzea, baldin eta dohainik banatzen badira eta gertakariaren publizitate euskarri moduan erabiltzen badira.

2. Espainiako edo nazioarteko azoketan berariazko pabiloiak instalatzea edo muntatzea, horietan gertakariaren turismo sustapena egiten bada.

3. Gertakariari buruzko publizitate kanpainak egitea, Espainian nahiz nazioartean.

4. Komunikabideek doako guneak lagatzea "Zuhaitza bizitza da" partzuergoak ekitaldiaren sustapenerako iragarkiak txertatzeko.

b) Zuzenean gertakariaren sustapenerako balio izan behar dute, beren edukiak horren zabalakunde bultzatzen duelako.

Kenkariaren oinarria egindako inbertsioaren zenbateko osoa izango da publizitate euskarriaren edukia funtsean gertakariaren berri zabaltzea izanez gero. Bestela, kenkariaren oinarria egindako inbertsioaren ehuneko 25 izango da.

2. Uztailaren 12ko 16/2004 Foru Arauaren 30. artikuluko 3. zenbakiko Laugarren idatz zatiak jarduera ekonomikoen gaineko zergarako aurreikusitako hobariari begira, iritziko da Laugarren idatz zati horretan aipatzen diren jardueretatik hobaritu daitezkeenak honako hauek direla: "Zuhaitza bizitza da" partzuergoak ezarritako plan eta egitarauen barruan izanik, zergaren tarife-tako epigrafe edo talde egokian alta hartu eta zerga ordaindu beharra berekin dakartenak, zerga pizgarria eskatu duen pertsona edo erakundeari jarduera ekonomikoen gaineko zergarengatik ordura arte dagokion zerga kuotaz gainera eta horretatik aparte.

3. Uztailaren 12ko 16/2004 Foru Arauak, irabazteko xederik gabeko erakundeen zerga araubideari eta mezenasgoaren zerga pizgarriari buruzkoak, bere 30. artikuluko 3 zenbakiko Bosgarren idatz zatian aurreikusten duen toki zerga eta tasetako hobariari begira, iritziko da zerga pizgarria eskatzearen xedea den eragiketa bakar-bakarrik delako programaren garapenarekin loturik dagoela baldin eta "Zuhaitza bizitza da" partzuergoak ezarritako plan eta egitarauak sustatu eta garatzeko ekintzei bakarrik badagokie.

Aipatutako idatz zatian adierazten diren tributuen artean ez dira sartuko ondasun higiezi-
nen gaineko zerga, trakzio mekanikozko ibilgailuen gaineko zerga eta egindako eragiketak zergapetzen ez dituztenak.

3. artikulua. Zerga administrazioak zerga onurak aitortzeko jardunbidea

1. Sozietateen gaineko zergan, pertsona fisikoen errentaren gaineko zergan eta ez-egoiliarren errentaren gaineko zergan aurreikusitako kenkariaren aplikaziorako subjektu pasiboek duten eskubidearen alde aurreko aitortpena Arabako Foru Aldundiaren Ogasun Zuzendaritzako organo eskudunak egingo du, interesdunak eskatu ondoren.

Aitortzeko eskatzen den zerga pizgarriak ondorioak izango dituen zergaldiari dagokion autolikidaziorako arauzko epea hasi baino gutxienez hiru hilabete lehenago aurkeztu beharko da eskabidea. Eskabide horri, "Zuhaitza bizitza da" partzuergoak emandako ziurtagiria erantsi beharko zaio, kreditatzen duena eskabidean adierazten diren kenkari eskubidedun gastuak haren jarduera planak eta egitarauak betetzeko egin direla.

Jardunbide honetan eskumena duen organoaren ebazpen espresua jakinarazi behar den epea hiru hilabete izango da, eskabidea eskudun organo horren erregistroan sartzen den egunetik aurrera. Epe horren kontaketa eten egingo da interesdunari eskatzen zaionean aurkeztutako dokumentazioa osatzeko, edo interesdunari nahiz partzuergoari eskatzen zaenean, artikulua honetako 5 idatz zatian ezarritakoaren ondorioetarako. Eskaera hori jakinarazten denetik eskatutako dokumentazioa aurkeztzen den arte iraungo du etendurak.

Aurreko paragrafoan adierazi den epea igaro eta interesdunak ez badu jaso bere eskaerari buruzko jakinarazpenik administrazioetik, aitorpena emandakotzat joko da.

Interesdunek hala nahi badute, eskabidea aurkeztu baino lehen, SEA Empresarios Alaveses elkartera jo dezakete horrek aholku eman diezaien, beren eskabidea aurkezteari begira.

2. Jarduera ekonomikoen gaineko zergako subjektu pasiboek zerga horretan aurreikusten den hobarirako duten eskubidearen alde aurreko aitorpena, interesdunak eskatu eta gero, dagokion udalerriko udalak edo Arabako Foru Aldundiak egingo du, eskumen hori nori dagokion.

Aldez aurreko aitorpen horren eskaerari, "Zuhaitza bizitza da" partzuergoak egindako ziurtagiria erantsi beharko zaio, egiaztatzen duena uztailaren 12ko 16/2004 Foru Arauaren 30. artikuluko 3. zenbakiko Laugarren idatz zatian adierazten diren jarduerak (dagokion ekitaldia ospatzen den bitartean egiten direnak) horren jarduera plan eta programen barruan kokatzen direla.

3. Beste toki zerga eta tasa batzuetan aurreikusitako hobarien aplikaziorako, subjektu pasiboek eskabidea aurkeztu beharko dute dagozkien zergen kudeaketa bere gain daukan erakundearen. Eskabide horrekin batera, foru dekretu honetako 2. artikuluko 3 idatz zatian ezarritako eskakizuna betetzen duelako ziurtagiria aurkeztu beharko da, "Zuhaitza bizitza da" partzuergoak emana.

4. Artikulu honetako 2. eta 3. idatz zatietan aurreikusitako jardunbideetan eskumena duen organoaren ebazpen espresua jakinarazi behar den epea bi hilabetekoa izango da, ebazteko eskumena duen organoaren erregistroan eskabidea sartzen den egunetik aurrera. Epe horren kontaketa eten egingo da interesdunari eskatzen zaionean aurkeztutako dokumentazioa osatzeko, edo interesdunari nahiz partzuergoari eskatzen zaientean, artikulu honetako 5 idatz zatian ezarritakoaren ondorioetarako. Eskaera hori jakinarazten denetik eskatutako dokumentazioa aurkeztu den arte iraungo du etendurak.

Aurreko paragrafoan adierazi den epea igaro eta interesdunak ez badu jaso bere eskaerari buruzko jakinarazpenik administrazioetik, alde aurreko aitorpena emandakotzat joko da.

5. Aurreko idatz zatietan xedatutakoaren arabera zerga pizgarriaren aitorpena egiteko eskumena duen organoak "Zuhaitza bizitza da" partzuergoari edo eskatzaileari eskatu ahal izango dio foru dekretu honetako 4. artikuluko 1. idatz zatian adierazten den dokumentazioa aurkez dezala, aitortzeko eskatzen den zerga pizgarriaren aplikaziorako ezarritako eskakizunak betetzen direla egiaztatzeko.

4. artikulua. "Zuhaitza bizitza da" partzuergoaren ziurtagiriak

1. Foru dekretu honetan adierazten diren ziurtagiriak lortzeko, interesdunek eskabidea aurkeztu beharko diote "Zuhaitza bizitza da" partzuergoari, Arabako Foru Aldundiaren Erregistro Orokorrean. Eskabide horri erantsi beharko diote egindako gastuaren edo asmotan dagoen jardueraren ezaugarriekin eta helburuarekin loturiko dokumentazioa, baita ere aurrekontua eta hura gauzatzeko modua eta epeak.

Ziurtagiriak jaulkitzeko eskabideak aurkezteko gehieneko epea gertakaria amaitu eta hilabete geroago bukatuko da. Hori guztia, foru dekretu honetako 3. artikuluko 1 idatz zatian finkatutako epearen kalterik gabe.

Interesdunek hala nahi badute, eskabidea aurkeztu baino lehen, SEA Empresarios Alaveses elkartera jo dezakete horrek aholku eman diezaien, beren eskabidea aurkezteari begira.

2. "Zuhaitza bizitza da" partzuergoak, bidezkoa baldin bada, eskatutako ziurtagiriak emango ditu, aurreko idatz zatian ezarritakoaren arabera. Horietan, gutxienez, ondoko hauek jaso beharko dira:

- a) Eskatzailearen izena eta abizenak edo sozietate izena, eta identifikazio fiskaleko zenbakia.
- b) Zerga egoitza.

c) Jardueraren edo gastuaren deskribapena, eta guztirako zenbatekoa.

d) Jarduera partzuergoaren jarduera plan eta egitarauen barruan kokatzen delako edo gastua horiek betetzeko egin delako baieztapena.

e) Propaganda eta publizitate gastuak izatekotan, euskarriaren edukia funtsezkoa den edo ez den ematea, kenkariaren oinarria kalkulatzeari begira.

f) Ziurtagirian adierazten diren gastu edo jardueretarako zerga pizgarriak finkatzen dituen lege aginduaren aipamena.

3. Artikulu honetan adierazten diren ziurtagiriak jakinarazi behar diren epea bi hilabetekoa izango da, dagokion eskabidea Arabako Foru Aldundiaren Erregistro Orokorrean sartzen den egunetik aurrera. Hala ere, epe hori eten ahal izango da akatsak zuzendu behar izatekotan, edo dokumentuak eta epaitzeko beharrezko beste elementu batzuk aurkeztekotan.

Adierazi den epean ez bada jasotzen eskabideari buruzko eskaerarik edo jakinarazpenik administratziotik, betetzat emango da artikulu honetan adierazten den eskakizuna, eta interesdunak zerga pizgarriaren aitortpena eskatu ahal izango dio zerga administrazioari, aurreko artikuluan xedatutakoaren arabera, eskabidearen kopia zigilatua aurkeztuz.

5. artikulua. "Zuhaitza bizi da" partzuergoak emandako ziurtagiriak bidaltzea

"Zuhaitza bizi da" partzuergoak, urtarrilean, apirilean, uztailan eta urrian, foru dekretu honetan aurreikusten denaren arabera aurreko hiruhilekoan emandako ziurtagirien kopia bidaliko dio Arabako Foru Aldundiaren Ogasun Zuzendaritzari, ondoren dagozkien kudeaketa organoetara bidaltzeko.

Partzuergoak ez badu bidali eskatutako ziurtagiria aurreko artikuluan xedatutakoaren arabera, interesdunak aurkeztutako eskabidearen kopia bidali beharko du.

6. artikulua. Lehentasunezko mezenasgoaren araubidearen aplikazioa

1. Uztailaren 12ko 16/2004 Foru Arauak, irabazteko xederik gabeko erakundeen zerga araubideari eta mezenasgoaren zerga pizgarriei buruzkoak, bere 30. artikuluko 3 zenbakiko Bigarren idatz zatiko bigarren paragrafoan xedatutakoaren ondorioetarako, lehentasunezko mezenasgoaren onurak dituzten entitate edo erakundeek "Zuhaitza bizi da" partzuergoaren ziurtagiri egokia lortu beharko dute, foru dekretu honetako 4. artikuluan xedatutakoaren arabera. Ziurtagiri horretan, egindako jarduera partzuergo horrek onartutako egitasmo eta programen barruan kokatzen dela ziurtatu beharko da.

2. Aurreko idatz zatian adierazten diren entitate eta erakundeek aurkezleei eman beharko dizkiete uztailaren 12ko 16/2004 Foru Arauak, irabazteko xederik gabeko erakundeen zerga araubideari eta mezenasgoaren zerga pizgarriei buruzkoak, 25. artikuluan aurreikusten dituen ziurtagiriak eta, ekitaldi bakoitzaren amaieraren hurrengo hilabetean, partzuergoari bidali beharko diote ekarpen horien kontura finantzatutako jardueren zerrenda, baita jaulkitako ziurtagirien kopia ere.

3. Partzuergoak jasotako ziurtagirien kopia bidaliko dio, horiek jaso eta hurrengo hilabetearen barruan, Arabako Foru Aldundiaren Ogasun Zuzendaritzari.

XEDAPEN GEHIGARRIA

Uztailaren 12ko 16/2004 Foru Arauak, irabazteko xederik gabeko erakundeen zerga araubideari eta mezenasgoaren zerga pizgarriei buruzkoak, bere 30. artikuluan aparteko interes publikoa duten gertakarietan laguntzeko programetarako aitortutako zerga pizgarriak Estatuko eta foru lurraldeetako organo eskudunek halakotzat jotzen dituzten jarduerari eta egitarauari aplikatutako zaizkie, baldin eta haiek onetsitako arautegian elkarrekikotasunez aitortzen badira Arabako Foru Aldundiak onetsitako jarduerak eta programak.

AZKEN XEDAPENA

Foru dekretu hau ALHAOn argitaratu eta hurrengo egunean jarriko da indarrean.

Vitoria-Gasteiz, 2014ko ekainaren 26a

Diputatu nagusia

JAVIER DE ANDRÉS GUERRA

Ogasun, Finantza eta Aurrekontu Saileko diputatua

AITOR URIBESALGO LORENZO

Ogasun zuzendaria

JUAN IGNACIO MARTÍNEZ ALONSO